

華陽散稿



華陽散稿

卷上

金壇 史震林悟岡撰

記嗟翁

翁居洮湖之上。喜放生。蛇困蛙。蟻困蚓。蠃蝸困蝶。螳螂困蟬。必救之。自結茅築土爲室。製方扁。題以一字曰嗟。或稱爲嗟翁。則應曰嗟。積破書百餘帙。皆婦人納鍼線者。而易之以紙也。辛酉秋。客約震林問放生之道。翁曰。幼時拾螺於道。有笑余者而止。旋悔曰。一笑之辱。輕一命之殄重也。農者斷蛙於鋤鎌之下。無心也。無心則無過。不忍者猶恍然憫之。睇而歎曰。孽斯萬物之怨釋。造物之憾平矣。震林避席再拜之。翁曰。與富言吝。與貴言驕。與才言狂。與力言猛。弗悅者十之一。與吝言貪。與驕言忌。與狂言侮。與猛言暴。弗悅者百之一。與貪言好施。與忌言好獎。與侮言好讓。與暴言好生。悅則彼爲福。否則吾無過也。余拜曰。先君子之誨震林也。語多合矣。客曰。今者禍福之報。不漸爽歟。翁曰。不然。此憤世之言也。福莫大於陰德。禍莫大於陰惡。口慈意忍者。鬼神惡之。善重惡輕者。天所宥也。客曰。僕窘於衆亦屢矣。翁曰。多疑者勿與遊。多欲

者勿與儔。多鄙者勿與求。多詐者勿與謀。多妒者勿與修。以自全也。將退。翁留飲。既暮。將別。翁執余手曰。敝廬之辱君也。應不數矣。更有獻於君。自伐者無功。自專者無成。自利者無親。自是者無朋。自滿者無終。自銜者無名。余謝曰。敬受教。翁姓呂。鄉人略其名。第呼爲放生翁。

記馬授疇

授疇名璞。長州人。磬莊先生子也。磬莊與蔡忠襄金正希從學新安雲莊程子。既老。屏跡於羊山。程子墓廬。蓋嘗獨居三年者也。授疇至。性過人。年十二。負米數百里外。自炊飯和羹。以養父。父歿。乃爲萬里遊。歌大江。頌黃河。徒步三千里。遊京師。過泰山。登焉。宿日觀峯。候日出。賦之時。方弱冠。康熙癸巳歲也。其明年復南遊。問道山陰。泊富春江。咏子陵釣臺。跨桐廬。上龍游。環江郎之山。度仙霞關。入閩。浮舟下延平。倚天柱峯。歷危灘數百里。駐甌甯。望武夷之曲。道仙遊。出晉江。梯白翻嶺。憩永春縣治。食荔枝。避暑於大鵬山。至漳浦。俯漳臺。鼓櫓出廈門。觀海而還。所至州郡。當道者。多磐莊先生門下士。至輒去之。所過佳山水。則留詩。謂如我意中人也。性好施於漳。見二客。資其窮。復見於廈門。或曰。此僞也。授疇曰。是僞也。毋甯受欺。衆以僞僞人。所以愈無告也。度嶺。老幼擁輿而啼。給以錢。或曰。衆不徧將。授疇曰。身有疾痛。必掙之。吾掙吾心痛耳。至武林。方飲。豔妓來。弗狎。慰而悲之。妓泣。以酒酹地曰。夙孽也。奈之何。有憐我以欲。無

憐我以情者。况以義憐我乎。授疇嘗言獨居時。每忽忽成感慨。見貧苦人。淚數嚔。意更無聊。天壤間有。如我癡絕人。當肝膽贈之。魂魄殉之也。戊戌秋。復北上。時方修古今圖書集成。一萬卷。當事者薦授疇修閩媛典三百七十六卷。廁名者皆得官。獨弗及。蒲城屈悔翁。爲作崑崙歎。雍正壬子冬。詔求賢。侍郎陳慈田薦之。得監督興平倉。尋被劾。仁和姚侍郎舉授疇。應乾隆丙辰鴻博科。辭不果。授疇與陳散樗相莫逆。喜歙州處士宋介三文。與屈悔翁詩。散樗介三歿。於悔翁益繼絕。居都下數十年。窮益甚。年五十未娶。昔所聘已死。後聘毘陵女。將娶。以罷官而止。一姊名婧。赴都就食。婧能詩。年三十始嫁。終爲薄命云。

記陳散樗

雍正己酉春。識散樗於廣陵。目余爲國士。愧之。庚戌。曹震亭會試。散樗求其詩。未答。乙卯。聞散樗卒。震亭有詩云。蕃釐別院苦吟身。瓊樹全枯感慨頻。能向塵中憐國士。竟從天上泣詩人。冰霜楚畹滋蘭夜。風雨驪門執轡春。秋色到今悲勝昔。寒蕪如錦菊花貧。易簪時。屬家客傳振華至江南。請余爲墓誌。誌云。嗚呼。此散樗夜臺也。散樗嚮於仕與年。功業無所見。請誌其言。謂余曰。名不符實者。天所成。實不副名者。天所傾。宜憂勤以求實。謙退以讓名焉。富莫樂於濟貧乏。貴莫樂於拔孤寒。自損者。天所益。自屈者。天所伸也。士大夫飾車服。炫辭令。則奢佞滋。樸

訥者導人於儉且質也。嗚呼。散樗而壽。豈竟無功業者哉。散樗官京師。雍正辛亥歲。以省母歸。楚壬子病。賦悲秋行而卒。名樹萊。字瑤田。長沙湘潭人。恪勤公陳鵬年第八子。母王氏。少司農樹萱之胞弟。己酉。孝廉樹葵刑部郎中。樹著之親弟也。年二十有七。無子。妻江氏守志。銘曰。浩浩兮楚天。死爲才鬼。亦當勝於頑仙。

記秋草

秋草者。屈悔翁詩也。悔翁陝西人。鰥而爲客。客蜀。客晉。楚。旣而客吳。年且老。北上客燕趙。旣倦。止京師之湘潭書院。依恪勤公之子刑部郎中陳樹著。都人素聞悔翁名。喜其至。王公以下交贊於其門。悔翁年已七十。鬢眉皆白。方袍赤舄。著梅花錦襪。登座說詩。諸名士肅然環聽。長洲馬授疇博學有奇才。尤敬事之。雍正己酉。余識之於廣陵。乾隆丙辰。與曹震亭訪於都。請其集。未刻。少時有刻者。今毀去。授余秋草詩十首。詩云。天盡平蕪匝地涼。玉門昨夜有微霜。望中白日寒山上。愁外蒼煙古道旁。西去關河連絕塞。南歸鴻雁叫斜陽。茂陵客有劉郎否。萬馬蕭蕭獵未央。角弓風勁更誰論。一片寒蕪似錦茵。難與綠莎遙鬪色。那堪黃菊共爭新。踟躕徒使藏狐兔。搖落何須泣風麟。見此茫茫驚歲晚。登臨長憶故園春。迴風動地萬方前。黃落何堪眺蜀川。踏作塵埃迷四野。遙隨車馬轉青天。陶家三徑應成恨。漢代諸陵倍可憐。垂老有情思。

故國榮枯果否似當年。露深長。信雖宮靜。火燒咸原。白晝昏。海角無端歸燕子。天涯終是怨王孫。沾衣路狹長安道。曳履城頽古塞垣。悲向西風。曾作賦。適來南浦更消魂。蒼涼日日喚愁生。不雨陰寒不擬晴。縱有腰鐮傷歲暮。曾無烈火懶山行。惱儂攪結三春事。悲此凋殘萬古情。多病遊人頭盡白。百年容易暮雲平。萬壑荒烟萬里悲。東西南北更何之。蓬飛畦隴岷崙轉。風動蕭森海島吹。鷄犬不鳴荊棘早。田園有迹雪霜遲。只應莎草寒猶綠。腸斷春明舊鳳池。李花歷亂最青葱。無意迴飄刮宇中。冀北霜華常七月。燕南袍色遜東風。誰家陵闕荒殘照。何處牛羊見故宮。時序已宜盡樵采。江天猶自滿寒空。水真衣帶魚龍夜。山似蓮花翠綠枯。白露爲霜幽徑冷。六朝如夢桂花孤。不知蝴蝶飛何處。尙有蚊蟲繞敝櫺。桃葉渡邊猶旖旎。琅琊大道弔騷蕪。大江北望大河流。河畔烟霜動客愁。欲問夕陽空照水。深知遠浦不勝秋。驛門今日悲前度。梁苑當時怨白頭。記得落花雖有恨。蕭條中野古神州。中天白露尙溥溥。滿目淒迷忽已殘。平野經時鋤未盡。深閨幾日鬪方闌。風吹禾黍行人少。水涸池塘曉夢寒。不是一番霜有信。樵青安得倚雲看。

記孔嬖衛姬

乾隆辛酉重九日未曉潤州沙陷人皆死於夢浮枕如萍前五夜漁者見黑衣吏向江檢

一黑籍問之曰。殺報也。宜速好生。投黑籍於江而隱。沙客告余曰。居人好殺。產女多溺之。日捕螺。稚子學持刀。剖蛙蚌者。父母獎其能。孔婆者戒殺。年七十。猶嚮續放生。於姑勸慈。於媳勸孝。見人則諄諄曰。掃螺救蟻。俱是陰德。勿以善小而不爲也。衆皆怒。子死。一孫方齠。時忽瘡。攜孫避瘡於尼庵。得免。是歲七月十九日。大風雨。海沸。十餘洲皆沒。海陵有跛媳。衛氏也。姑虐之。獨負姑走避水。水及其唇。捧姑於肩。倚槐飲浪而不仆。有楊浮至。乘之不死。媳方受笞。血痕在背。未平也。姑有三媳而寵其二。水至。號二媳皆不願。而升於垣。垣崩皆溺死。姑病將死。持跛媳之手。告諸婦人曰。爲姑慎無有偏也。救我乃跛媳乎。爲姑慎無過虐也。

記髯叟

叟新安人。未冠生髯。旦起必祝於鏡曰。無蟹而鉗。我髯是瞻。無燕而尾。我髯是喜。祝三年而乃大豐。邑人稱之曰髯君。漸老。改稱曰髯叟。口直。好面規人。少年稍淫佚者。必痛斥。皆俯聽。莫敢仰視。士大夫遇髯叟如嚴師。大敬畏之。商於蘇。將歸新安。同歸者十餘。各相戒避髯叟。登舟則鬚然先踞舟中矣。少年皆失色。欲引去。叟呵之。旣無奈。遂發。舟人女名蘭年。頗豔。黃生鳴臯者。居內艙。近之。髯叟數顧而戒曰。年少毋自輕也。黃生憚讓髯叟。叟掀髯應曰。可。明日。叟大病。蒙被忌。日月光。夜忌燭。諸生悉危坐無譁。意殊怏怏。病十日。舟抵新安。逮夜。幅巾擁髯。顫而

登輿。先是叟遊西湖。逢卜者使之卜髯。其象曰。髯舉舉。于有女。髯栩栩。前有羽。叟以爲吉也。既登輿。黃生責舟人曰。若不謹。以風露中老人耳。蘭年曰。吾有藥可治之。以巾裏物擲黃生。啓視。則髯叟髯也。色頰白。桀桀然。尺有咫焉。衆測其故。莫不歎蘭年貞且慧云。悟岡退士聞之曰。象有齒。以焚其身。賄也。叟有髯。以病其身。僞也。祝於幼年。衛於暮年。矜於少年。而贈於蘭年。惜乎異哉。

記棠仙

棠仙謝氏。父恆。母馮。皆好善。棠仙生有慈性。旬旬時。知讓蟲蟻。初學語。教以念佛。復於口不已。學行遇蟲蟻。合掌喃喃。遠避之。年及笄。骨相神彩。麗如刻畫。嘗蚤起觀海棠。嘆息。取露中花戲貼於靨。望之若無。母笑曰。此吾家海棠仙子也。因字爲棠仙。棠仙益好善。戒殺。愈自珍愛。志異凡女子。隣女相聚。私論曰。得婿而富。幸也。或曰。須貴。或曰。期美。棠仙方綉鶴。不語。鍼疾如電。鄰女問之。乃曰。姊所言。皆其下耳。玉體無瑕。竟委之地上人。奈何。有從天上來。貧賤醜老。心所甘也。從容問其父曰。世間共有幾許字。父漫應曰。五萬。秀才識字。能幾何。漫曰。五千。笑曰。何貧也。試以教兒。父於是日。取字教之。能記字萬餘。而字義悉解。年十八。父歿。有蔣嫗者。以佛事召其母爲媒。曰。尹家兒富而甚俊。何如。母信諾之。既受聘。乃繼室也。陋且貧。母大忿痛哭。散髮

持刀欲自刎。殉蔣孀。棠仙哭而勸曰。天所命也。兒無怨也。母素憐棠仙志。今誤之。慮其悲。倘死。然徐察其意。無幾微愠者。則又慟曰。豈天命哉。汝母急。竟誤兒矣。嫁數夕。棠仙自剪燭。請於其夫。聞亡姊有遺兒安在。夫曰在灶。兒失母。黃瘠如人臘。棠仙抱之泣。期年生子。慰遺兒曰。古語云。有弟而兄啼。吾不然也。每飲必教己子曰。先敬兄也。每食必戒曰。無與兄爭也。遺兒病。則晝夜坐帷中。減食色憂。愈乃喜。歲祭必親拜遺兒母而祝曰。姊勿以兒爲痛也。姊之靈。時察棠仙慈於己子。忍於遺子。殲棠仙可也。一日祭焚楮。火忽嘯。呖呖然灰旋及棟。撲棠仙。棠仙暈。聞嬾媛能視鬼。召之。遺兒母憑嬾媛告棠仙曰。司命以妹好生。列名仙冊。送華陽易遷宮。有烏衣婦來訴曰。謝棠仙手三刃余。慘痛。昨焚楮時。烏衣婦突至。吾禦之耳。明日遂瘞。蓋父歿時。念鷄羹而棠仙代庖也。辛酉秋。震林見馮母。問棠仙安否。猶悔而泣焉。言其事如此。其夫名載福。樸魯治田。長棠仙十餘歲云。棠仙好潔。拮据育二子。身自執爨。衣裙楚楚。無有塵氣。而色亦不衰。

記睡和尚

乾隆辛酉科李生。應舉不第。與其友王生叩於華陽睡和尚。和尚不知何方來。與之語。輒言人功過皆中。而旬月閉目。問之弗言。無人或自言曰。可憐可憐。兩生素負才。屢擯。將老。登茅山大哭。跪和尚前。乞一言而復起。和尚徐顧李生曰。子之婦三溺女而弗禁。壽且大折。得男亦

殘廢不才。遑念富貴乎。謂王生曰。子刻於財。冒於色者也。生自陳無過。和尚曰。貨金於人。息乃加五。生曰。否也。和尚曰。貧者遲償。併息於本。歲兩易券。否乎。王生自謂未嘗犯淫。曰。甯必身犯哉。窺之。目淫也。戲之。口淫也。詠之。筆淫也。夢之。夢淫也。思之意淫也。和尚閉目不復言。有蔣生失館而餓。叩和尚。和尚作呼犬聲。蔣愧悟拜而去。蔣於館食肉。有皮。輒呼犬擲之。

又記睡和尚

湖西放生庵。明季僧悲願所築也。庵殘毀數十年。僧無至者。一僧忽至。席黃茅。枕一草屨而睡。或曰。華陽睡和尚也。菱臺馮處士觀之。著單破衲。露左肩。跣足。一草屨在旁。內藉蘆花。處士供以蔬筍。有問者。則趺坐閉目。應之。王家婦既嫠而瘖。舉止狂亂。十餘年不治。夫挈之叩和尚。和尚曰。字紙襯鞋底可乎。遂謂衆人曰。窗眼牆罅中。有寒廢字者。宜速焚之。勿狼籍入穢處。受惡報也。莊姓者富而忽貧。凍餒。意欲自盡。和尚曰。以朽米飼猪。而飢者弗施半勺。以故綿藉犬。而寒者弗捨寸絲。雖死無善趣耳。鄰邑馬生。課徒菴北。性褊躁。善侮謗師友。向和尚誦昌黎佛骨表以譏之。和尚曰。口銳者天鈍之。目空者鬼障之。馮處士乃從容問和尚曰。如何是空。應曰。上不怨天。下不尤人。如何是戒。已所不欲。勿施於人。如何是悟。見利思義。見色思禮。如何是清淨。諸惡莫作。衆善奉行。越數日。謂處士曰。吾欲往陽羨山中訪如是僧。君從我。遂與至陽羨。

山見如是僧。僧不識字。聞金剛經六如偈。悟曰。足了吾大事矣。因號如是僧。和尚命僧煮茗候客。忽山主徐某來。聞和尚神異。叩之。和尚方熟睡。夢譚曰。香兒可憐。可憐。香兒。徐之寵童也。徐立遣之。和尚乃別馮處士曰。吾暫往銅官第五峯。遂去。

惲壽侯傳

壽侯公諱長祉。自號重遠。武進人。吾友惲甯溪之祖父也。父定伯。舉五子。公長。弱冠以家累棄書。有談舉子業者。參以言。哂曰。爾何知。遂發憤折節讀書。爲人訓童子。五官並用。期年而學進。成文章。歲試得首拔。爲郡諸生。哂之者悔之。姓孝友。慷慨尙氣誼。弟哲有狂疾。數侮公。踞公臥榻。溺於食器。且焚屋。公弗嗔。哲袴單。脫已袴與之。曰。吾弟寒。易斗粟。分數升與之。曰。吾弟饑。孫讀書則教其姪。曰。吾弟亦望兒讀書也。妹貧。給以麵。暑夜自驅牛磨之。婦執篲苦蚊無怨也。邑人高方芝。以訴荒忤縣令。吏捕急。方芝匿。逮其母。公謁令曰。方芝孝。當自出耳。已而果出。方芝死於徙。妻殉之。皆藁葬。公跋涉千餘里。加土立石。書曰。武進義俠高方芝。同妻貞烈宣氏之墓。設奠哭盡哀。翁是時年已六十矣。丹陽有壻。却婦翁者。其從十餘人。武進窮民也。乞公救。公曰。律法親屬相盜滅等。投到得免死。願投到乎。皆曰諾。公率之投本邑。殷令殷嗜詩酒。疏吏事。大愴曰。民窮吾罪也。卽投到庸免乎。逸耳。衆皆逸。上官怒。置公於法。盜聞之。皆復來。擬大辟。

公坐縱盜律擬徙。仰天而嘆曰。嗟乎。上帝好生。聖主好生。上官者。體好生以救民者也。潤城守陳公反覆引律例。以去就爭。上官得援投到例釋不坐。凡五年。鬚髮盡白。病肝數暴怒。二年而卒。卒時索筆寫數字不成。日方午。命燭。甯溪跪泣曰。公意教子孫孝友。凡事須重義。勿辱先云耳。首連肯。指心曰。無愧。公課徒善誨勉人曰。上儲四金耳。吾輩安坐倍之。無功。主子孫不識字報。又曰。吾幼失學。然善味孔孟語。每以一兩字成事業焉。平居木訥。事有不平。則履大庭。折豪貴。辭氣侃侃。嚴不傷和。怒者霽顏。辨者咋舌也。謙厚廉介。有勞不伐。或酬之。却曰。以利爲義乎。卽怨公者。無不心服云。

貞仙傳

貞仙蔡氏。父無子。自教之讀書。每日請其父說忠孝節義事。有奸邪負心者。則嘆曰。爲人。乃如是耶。旣退。必焚香拜天。自幸得聞忠孝節義人。字於同邑之于氏。年十九。將嫁。夫大病。卜者曰。迎婦則吉。時父方歿。母難之。貞仙請於母曰。往而吉。違之不仁。且無義也。母然之。遂往。夫死。分所簪如意釵。簪其一於夫首。脫一釵。納夫之腕。哭而絕。復蘇。初聘時。夢金釵入手。斷爲草質。取銀釵。復斷如初。珠翠皆成紙花。有吟云。草草絃中曲。忙來半局棋。至是驗云。及殮。截髮納棺。縊於柩旁。救之不死。旋墮樓。弗克。夢其父示以節孝二字。曰。宜兩全。於是和顏事舅姑。時姑

尚未舉次子。乘其喜。常爲說古今賢婦人。爲夫廣姬妾。獲福報者。姑從之。且使主家事。忌者譖之。貞仙辭於姑曰。媳不才。家事弗能理也。忌者又譖之。謂其有他志。貞仙乃泣曰。節孝甯復能兩全耶。於是夜取所讀書。并自書手迹。與所作詩詞。泣而焚之。啓匣檢所存如意簪手釧各一。泣玩良久。戴而復脫者三。嗚咽俯仰。悲不自勝。促老嫗先寢。更衣對鏡。撩髮取素繩。纏如意簪於髻。甚固。抹釧歔歔。顧女婢曰。以託汝。倘死勿爲人所脫也。旦起襲故衣。問安於姑所。辭色和婉如平時。午侍食。旣撤。入房而縊。時乾隆丁巳六月五日也。年二十有五。貞仙父字斗南。其叔字秋巖。余友也。秋巖館勾曲。每歸必視之。問曰。聞舅姑以譖常挫汝。有之乎。對曰否。天下無不是底父母。古賢婦有訟其舅姑者乎。卽死。切勿有他言也。

道士朱復齋詩序

方外友元蓂子。心朗月。意止水。頃之月忘雲。水忘風。頃之雲化月。風化水。交余數十年。不厭。月不厭雲。水不厭風也。一日謂余曰。吾未識魔。於是遊於書魔。戲於畫魔。狎於詩魔。始而曰。魔乃吾友。旣而曰。魔乃吾師。喟然而歎。與之處亦不厭。小春之月。一霞始晴。一峯始明。一禽始清。一梅始生。而元蓂子一詩始成。與梅相悅。與禽相得。與峯相立。與霞相揖。震林曰。子其妙於詩矣。元蓂子笑曰。銅於詩者勞。泐於詩者逸。浮生無名。以詩爲名。浮生無實。以詩爲實。則是浮

生無爭。以詩爲爭。浮生無礙。以詩爲礙也。空有想。想有境。境有味。味自甘。境自歡。想自饒。空自波。皆牴心者也。萬物不能無牴。雲牴月而不損。風牴水而不涸。詩牴心而不勞。則牴我者皆化我者也。

王澹園詩序

澹園高士。詩人多不喜。謂其難於解也。澹園豈不能爲可喜可解之詩哉。其意蓋在三代以上。并不在三唐以前也。澹園茹李杜而吐之。茹陶謝而吐之。茹蘇李而更吐之。胸中別有日月。而其光五色。別有河嶽。而其氣九層也。澹園俯首爲唐宋。則唐宋窮。俯首爲漢魏。則漢魏窮。世人所喜。澹園不喜。世人所解。澹園不解也。少時得詩數百首。皆以李杜稱之。一旦焚詩。酹酒召李杜詩魂而告之曰。以李還李。以杜還杜。非我王澹園詩也。嗟乎。神亦溟滓矣哉。聊爲之辨。而緘其稿於名山。

與玉勾詞客吳長公書

仲冬既望。訪君於平山。不遇。寄食四宜園。破樓橫雪。脫粟菜根。敝縑如冰。布衾成鐵。擁爐貰酒。賴有震亨。境苦意甜。別饒清味。誦君澆習百端。堪冷悟。深情一卷。小知音之句。輒欲投筆荷鋤。同羣鳥獸。固知擾擾揚州。更難覓疏淡恬曠人如玉勾詞客者也。思以尺書投某長者。屬

稿既就。旋取焚之。誠不忍以客中一時之濫。發山中千載之歎耳。天寒歲晚。衝雪渡江。遲我故人。中心如噎。梅花未覲。竹實遂虛。鄙人伏處忘名。放言自廢。籜冠葛屨。抱甕灌園。尺蠖之境。鮒魚之轍也。久蟄思啓。久懣思噓。豈遂忘啓而噓哉。窮有所不爲。質有所不取。與狐謀裘。與鹿謀脯。有矯然駭耳。古銘云。嘽嘽之德。不足就也。不可以矜。而祇取憂也。嘽嘽之食。不足狃也。不能爲膏。而祇離咎也。田舍翁升斗相掇。銖兩相給。輒响然德色。惟巨靈氏手擘太華。達河流以灌澗轍。則澍且與鯉俱化爲鵬矣。言念君子。溫其如玉。道之云遠。我勞如何。夢中事。眼中淚。意中人。未可爲外人道也。漁樵之暇。補入西青。感慨亦復不淺哉。

與曹震亭書

雪樓贈醉雨舸。餞歸意何惻惻。歲何冉冉耶。謫從天上。名滿人間。酒盞詩瓢。勝於丹鼎。才情優絕。誰復如君。見者拜爲古賢。問者頌爲仙伯。家徒四壁。積感倍滋。而多寶如來。據囊坐笑。乃復吟風弄月。胸次悠然。此鄙人所瞻望後塵。降心稽首者也。語云。負重道遠。不擇地而休。家貧親老。不擇祿而仕。聞君暫就廣文。爲親而屈。未知何泮之光。何庠之福耳。二月初吉。于屈湖約同趙閫叔張莖瞻叩華陽。尋鬱岡。訪貞白故樓。二月夢瞻約嘗畫泉。遊鶴市。宿海涌峯。旬有五日。每遇霞鮮月潔。水靜山空。眷我良朋。同聲太息。詩云。何方可化身千億。一樹梅花一放翁。

余則願何妨得化身千億。一箇名山一震亭也。有訛傳繡君不幸者。驚不敢信。世痕夢影。惆悵易闌。當不喪達士明耳。

與玉勾詞客書

伏處華陽。迭逢饑饉。性復疏拙。恥於干人。詩云。失學從兒懶。長貧任婦愁。少陵贈我於千戰後哉。麥粥一甌。莎田半畝。刈藟不足以供爨。采棉不足以供織。戴笠荷鋤。每懷知己。知己誠有味也。去冬衝雪渡江。印西青四百卷。紅樓綠窗。索贈者半。今春同趙開叔張夢旂小埽花荆。振翔遊畫山。拜孝女孫曉霞。錄其詩草。而晚宜園仙眷。長隔暮霞。綃山浣衣。病不復起。感慨人感慨事。半在閨中。半在夢中也。自畫山登虎邱。見女郎韓夢音詩云。曉紅將墮爲誰留。重禮觀晉上虎邱。不及東風能喜捨。盡捐花片供春愁。修得花神誤此生。蝶情如夢未爲情。仙娥徧募傷春淚。添向琉璃夜倍明。憔悴人洵多有哉。舟庵之託。終無佳墅。舍西廢圃。幼所采薪灌莽。雖深。猶存梧柏。謀欲結茅築土。少憩賓朋。虛擬十年。投鐮自笑。家居畏客。偶聞剝啄。則瞿然以咳。客至如喘牛。見月客退如瘦馬。聞鉦貧交或過。渴話饑吟。彼此不爲嫌矣。謝春徂暑。落寞驚秋。遣候德音。輒期面慰。華陽螢火。芝不療饑矣。贈我護門草者。甯報以左行草哉。

與玉勾詞客書

未臘申秋。賫書申候。二札所言。鸞鳩爲笑。鷓鴣爲淚者也。士不可無知己。亦不可遠知己。三週恨別。年似千餘。此猶窟室長幽。晝無以窺日。夜無以窺月也。鄙人家如殘秋。身如晝晚。情如剩烟。才如遺電。偶與詩農樵士。琴僧酒丐。決踵露肘。豎筆橫墨。以自鳴其所喜。亦猶小草無聊。自矜其花。小鳥無奈。自矜其舌。世之諛牡丹寵鸚鵡者。目厭其瑣耳。病其絮也。玉勾詞客。薰以旃檀之澤。和以鸞鳳之音。此則西青散記。子開丑闢之奇運。不復更憂混沌者耳。吳中近事。君知否。新月家家拜玉勾。以視放翁團扇。迴判仙凡矣。十月之朔。夢登天九重。甚饑且寒。乞米於箕星。怒曰。糠在。乞錦於織女。笑曰。絲賣。覺以問母。母戒曰。慎。無夢登天也。復夢入地。有蚓號渴。則曰。泉竭。有蛇號苦。則曰。蟻侮。嗟乎。夢乃如是乎哉。昨過華陽之野。聞童謠曰。鳳飼餓鶴。麟扶病鹿。古霜寒足。今霜寒腹。鄙人登第歸田。宦情蕭瑟。三冬負米。兩夏採薪。四壁已傾。一瓢已敝。雖無不改之樂。然亦非不堪之憂也。

慰曹震亭書

農舍無樓。升古桐以候春色。雲膠似晦。野凍如秋。杏花天奈何作此愁態也。饑饉以來。渴澤之魚。細於鍼。童山之草。短於錐。而漁樵荒矣。去秋華方返自竹西。知君迭遭家變。孫以孝天。祖以慈終。爲君慰者。仰盡子職。俯全父道。天之所厄。無如何也。小人有母。口體不充。况云養志。